

禮
記

禮記卷第十七

表記第三十二

鄭氏注

子言之歸乎君子隱而顯不矜而莊不厲而

威不言而信

此孔子行應聘諸侯莫能用己心厭倦之辭也矜謂自尊大也

厲謂嚴顏色

子曰君子不失足於人不失色於人

不失口於人是故君子貌足畏也色足憚也

言足信也

失謂失其容止之節也玉藻曰足容重色容莊口容止

甫刑

曰敬忌而罔有擇言在躬

甫刑尚書篇名忌之言戒也言己外

敬而心戒慎則無有可擇之言加於身也

子曰褻襲之不相因也

欲民之母相瀆也

不相因者以其或以禘爲敬或以襲爲敬禮盛者以

襲爲敬執玉龜之屬也禮不盛者以禘爲敬受享是也

子曰祭極敬不

繼之以樂朝極辨不繼之以倦

極猶盡也辨分別政事也

祭義曰祭之日樂與哀半饗之必樂已至必哀

子曰君子慎以辟禍

篤以不揜恭以遠恥

篤厚也揜猶困迫也

子曰君子莊

敬日強安肆日偷

肆猶放恣也偷苟且也肆或爲褻

君子不

以一日使其躬儻焉如不終日

儻焉可輕賤之貌也如不

終日言人而無禮死無時子曰齊戒以事鬼神擇日月以

見君恐民之不敬也

擇日月以見君謂臣在邑竟者

子曰狎

侮死焉而不畏也

怵於無敬心也

子曰無辭不相接

也無禮不相見也欲民之無相褻也

辭所以通情也

禮謂摯也春秋傳曰古者諸侯有朝聘之事號辭必稱先君以相接也

易曰初

筮告再三瀆瀆則不告

瀆之言褻也

子言之仁者

天下之表也義者天下之制也報者天下之

利也

報謂禮也禮尚往來

子曰以德報德則民有所勸

以怨報怨則民有所懲

懲謂創艾

詩曰無言不讎

無德不報

讎猶答也

大甲曰民非后無能胥以寧

后非民無以辟四方

大甲湯孫也書以名篇胥相也民非君不能以

相安子曰以德報怨則寬身之仁也以怨報德

則刑戮之民也

寬猶愛也愛身以息怨非禮之正也仁亦當言民聲之誤

子曰無欲而好仁者無畏而惡不仁者天下

一人而已矣是故君子議道自己而置法以

民

一人而已喻少也自己自盡己所能行

子曰仁有三與仁同

功而異情

三謂安仁也利仁也強仁也利仁強仁功雖與安仁者同本情則異

與仁同功其仁未可知也與仁同過然後其

仁可知也仁者安仁知者利仁畏罪者強仁

功者人所貪也過者人所辟也在過之中非其本情者或有悔者焉仁者右也

道者左也仁者人也道者義也

右也左也言相須而成也

人也謂施以人恩也義也謂斷以事宜也春秋傳曰執未有言舍之者此其言舍之何人也

也厚於仁者薄於義親而不尊厚於義者薄

於仁尊而不親

言仁義並行者也仁多則人親之義多則人尊之

道

有至義有考至道以王義道以霸考道以爲

無失

此讀當言道有至有義有考字脫一有耳有至謂兼仁義者有義則無仁矣有

考考成也能取仁義之一成之以不失於人非性也

子言之仁有數義

有長短小大中心懔懔愛人之仁也率法而

強之資仁者也

資取也數與長短小大互言之耳性仁義者其數長大取

仁義者其數短小

詩云豐水有芑武王豈不仕詒厥

孫謀以燕翼子武王烝哉數世之仁也

芑枸櫞也

仕之言事也詒遺也燕安也烝君也言武王

豈不念天下之事乎如豐水之有芑矣乃遺

其後世之子孫以善謀以安國風曰我今不

閱皇恤我後終身之仁也

閱猶容也皇暇也恤憂也言我今尚

恐不能自容何暇憂我後之人乎

子曰仁之爲器重其爲道

遠舉者莫能勝也行者莫能致也取數多者

仁也夫勉於仁者不亦難乎

取數多者言計天下之道仁居

其多是故君子以義度人則難爲人以人望人

則賢者可知已矣

言以先王成法儼度人則難中也當以時人相比方

耳子曰中心安仁者天下一人而已矣大雅

曰德輶如毛民鮮克舉之我儀圖之惟仲山

甫舉之愛莫助之

輶輕也鮮罕也儀匹也圖謀也愛猶惜也言德之輕

如毛耳人皆以爲重罕能舉行之者作此詩者周宣王之大臣也言我之匹謀之仲山甫則能舉行之美之也惜乎時人無能助之者言賢者少小雅曰高山仰

止景行行之

仰高勤行者仁之次也景明也有明行者謂古聖賢也

子

曰詩之好仁如此鄉道而行中道而廢忘身

之老也不知年數之不足也俛焉日有孳孳

斃而后已

廢喻力極罷頓不能復行則子曰止也俛焉勤勞之貌斃仆也

仁之難成久矣人人失其所好

言仁道不得人所由不得

其志故仁者之過易辭也

辭猶解說也仁者恭儉雖有過不甚矣唯

聖人無過

子曰恭近禮儉近仁信近情敬讓以行

此雖有過其不甚矣夫恭寡過情可信儉易

容也以此失之者不亦鮮乎

言罕以此失之詩云溫

溫恭人惟德之基子曰仁之難成久矣唯君

子能之

言能成仁道者少也

是故君子不以其所能者

病人不以人之所不能者愧人

病愧謂罪咎之

是故

聖人之制行也不制以己使民有所勸勉愧

恥以行其言

以中人爲制則賢者勸勉不禮及者愧恥聖人之言乃行也

以節之信以結之容貌以文之衣服以移之

朋友以極之欲民之有壹也

移讀如禾汜移之移移猶廣大

也極致也壹謂專心於善

小雅曰不愧于人不畏于天

言人

有所行當慙怖於天人也

是故君子服其服則文以君子

之容有其容則文以君子之辭遂其辭則實

以君子之德

遂猶成也

是故君子恥服其服而無

其容恥有其容而無其辭恥有其辭而無其

德恥有其德而無其行

無其行謂不行其德

是故君子

衰絰則有哀色端冕則有敬色甲冑則有不

可辱之色

言色稱其服也

詩云惟鷦在梁不濡其翼

彼記之子不稱其服

鷦鷯胡汚澤也汚澤善居泥水之中在魚梁以

不濡汚其翼爲才如君子以稱其服爲有德

子言之君子之所謂

義者貴賤皆有事於天下天子親耕粢盛秬

鬯以事上帝故諸侯勤以輔事於天子

言無事而

居位食祿是不義而富且貴

子曰下之事上也雖有庇民

之大德不敢有君民之心仁之厚也

庇覆也無君民

之心是思是故君子恭儉以求役仁信讓以

求役禮不自尙其事不自尊其身儉於位而

寡於欲讓於賢卑己而尊人小心而畏義求

以事君

役之言爲也求以事君者欲成其忠臣之名也

得之自是不

得自是以聽天命

言不易道微祿利也

詩云莫莫葛藟

施于條枚凱弟君子求福不回

凱樂也弟易也言樂易之

君子其求福脩德以俟之不爲回邪之行其以要之如葛藟之延蔓於條枚是其性也其

舜禹文王周公之謂與有君民之大德有事

君之小心

言此德當不回也

詩云惟此文王小心翼

翼昭事上帝聿懷多福厥德不回以受方國

昭明也上帝天也聿述也懷至也言述行上帝之德以至於多福也方四方也受四方之

國謂王天下

子曰先王諡以尊名節以壹惠恥名

之浮於行也

諡者行之迹也名者謂聲譽也言先王論行以爲諡以尊名者

使聲譽可得而尊言也壹讀爲一惠猶善也言聲譽雖有眾多者節以其行一大善者爲諡耳在上曰浮君子勤行

成功聲譽驗行是所恥

是故君子不自大

其事不自尙其功以求處情過行弗率以求

處厚彰人之善而美人之功以求下賢

率循也過

行不復循行猶不貳過

是故君子雖自卑而民敬尊之

言謙者所以成行立德

子曰后稷天下之爲烈也豈一

手一足哉

烈業也言后稷造稼穡天下世以爲業豈一手一足喻用之者多無

數也唯欲行之浮於名也故自謂便人

亦言其謙也辟

仁聖之名云吾便習於此事之人耳

子言之君子之所謂仁者

其難乎詩云凱弟君子民之父母凱以強教

之弟以說安之樂而毋荒有禮而親威莊而

安孝慈而敬使民有父之尊有母之親如此

而后可以爲民父母矣非至德其孰能如此

乎

有父之尊有母之親謂其尊親己如父母

今父之親子也親賢

而下無能母之親子也賢則親之無能則憐
之母親而不尊父尊而不親水之於民也親
而不尊火尊而不親土之於民也親而不尊
天尊而不親命之於民也親而不尊鬼尊而
不親

或見尊或見親以其嚴與恩所尚異也
命謂四時政令所以教民勤事也鬼謂

四時祭祀所以
訓民事君也

子曰夏道尊命事鬼敬神而

遠之近人而忠焉先祿而後威先賞而後罰

親而不尊

遠鬼神近人謂
外宗廟內朝廷

其民之敝憊而愚

喬而野朴而不文

以本不困於刑罰少詐譖
也敝謂政教衰失之時也

殷人尊神率民以事神先鬼而後禮先罰而

後賞尊而不親

先鬼後禮謂內宗廟外朝廷也禮者君臣朝會凡以摯交

接相

施予其民之敝蕩而不靜勝而無恥

以本快於鬼神

虛無之事令其心放蕩無所定困於刑罰苟勝免而無恥也月令曰無作淫巧以蕩上心

周人尊禮尙施事鬼敬神而遠之近人而忠

焉其賞罰用爵列親而不尊

賞罰用爵列以尊卑爲差

其

民之敝利而巧文而不慙賊而蔽

以本數交接以言辭

尊卑多獄訟

子曰夏道未瀆辭不求備不大望於

民民未厭其親殷人未瀆禮而求備於民周

人強民未瀆神而賞爵刑罰窮矣

未瀆辭者謂時王不

尚辭民不褻爲也不求備不大望言其政寬貢稅輕也強民言承殷難變之敝也賞爵刑罰窮矣言其

繁文備設

子曰虞夏之道寡怨於民殷周

之道不勝其敝

勝猶任也言殷周極文民無恥而巧利後世之政難復

子曰虞夏之質殷周之文至矣

言後有王者其作質文不

能易

虞夏之文不勝其質殷周之質不勝其

文

言王者相變質文各有所多

子言之曰後世雖有作者

虞帝弗可及也已矣君天下生無私死不厚

其子子民如父母有憺怛之愛有忠利之教